

傷寒舌鑑
傷寒兼證析義
診宗三昧



自序

嘗讀仲景書。止言舌白胎滑。並無黃黑刺裂。至金鏡錄始集三十六圖。連後觀舌心法。廣至一百三十有七。何後世症變之多若此。宜知傷寒自表傳裏。舌胎必由白滑而變他色。不似伏邪瘟疫等熱毒自內達外之一病。便見黃黑諸胎也。觀仲景論中。一見舌白胎滑。即言難治。安有失治而致變者乎。所以仲景止言白胎已見一斑。不煩瑣屑。後人無先聖治未病之能。勢不得不反覆辨論。以啟蒙昧。蓋邪氣入裏。其虛實寒熱之機。必現于舌。非若脈法之隱而不顯也。況陰盛格陽。與邪熱潛伏。多有假症假脈。惟驗舌上胎色之滑燥厚薄。昭若冰鑑。無所遁形。由是取觀舌心法。正其錯誤。削其繁蕪。汰其無預于傷寒者。而參入家大人治按所紀。及己所親歷。共得百二十圖。命曰傷寒舌鑑。授之剞劂。以公同志。臨症之一助云。

康熙戊申如月誕先張登書於雋永堂



